

Go Baithuti ba rena, Bašomi le Baithuti ba maloba

Ke le ngwalela ka nako ya ditlhohlo, ka lehlakoreng le lengwe ke moferefere wo o hlokwago ke seteraeke seo se bego se se sa letelwa, seo se hlokwago tšhitišo ye kgolo tshepedišong le go ama gampe leina la yunibesithi, seriti le tlhomphe ya institšhušene ye ya ketapele, Yunibesithi ya Naga. Ka lehlakoreng le lengwe re bona boikgafo bja bašomi ba bangwe bao ba netefatšago tšwelopele ya yunibesithi le katlego mola go tšwelwa pele ka ditherišano tša ditaba tše go llwago ka tšona.

Ke na le tsebo ye e tletšego ya gore bontšhi bja lena le nyaka go tla mošomong go dira mešomo ya lena ya go fapana go abela batšeakarolo ba rena ditirelo, kudu baithuti ba rena, eupša le thibelwa go dira bjalo ka lebaka la maemo a mabe a go hlokwago ke bašomimmogo diferong tša dikhamphase le ditseleng tša go tsena ka dikhamphaseng tše dingwe tša rena, kudu dikhamphase tša Pretoria le Florida.

Maemo a a mpefaditšwe ke maitshwaro a mabe ka mokgwa wa go thiba ditsela le mafelo a botseno ka matlakala le dikutu tša mehlare, go tšhuma dithaere, go lahlela dipikiri godimo ga ditsela le ka go šomiša matšhošetši.

Le ge go le bjalo, ke kgothaditšwe ke dipego tša gore kgabagareng ya tše ka moka, go na le bašomi ba Unisa bao ba tšwelago pele go hwetša ditsela tša go šoma go netefatša gore ditirelo tše bohlokwa tša go abja ke yunibesithi di tšwela pele ntle le go šitišwa.

Ka ge le tseba, Labohlano la go feta e be e le letšatši la mathomo la ditlhahlobo tša semestara sa pele sa 2022. Ke thabile kudu go amogela pego ya gore letšatši la mathomo la ditlhahlobo e bile la katlego kudu le gore re tšwela pele ka ditlhahlobo ka moka tša semestara se. Gape ke netefaditšwe gore moo go ka bago le mathatanyana, dihlopha tše di hlometšwego go sepetša ditlhahlobo di kgona go bona mathata a le go a rarolla ntle le tshenygo ya nako.

Ke thabela gape go tseba gore go fapana le dipego tša maaka tše di phatlalatšwego, Semester Online Applications ya rena e butšwe ka Labobedi, 10 Mei 2022, gomme e sepela gabotse. Mo go sebaka se sa dikgopelo go buletšwe fela dithuto tše di kgethilwego tša *Undergraduate*, *Honours* le *Postgraduate Diploma* gomme dikgopelo di tlile go tswalelwa ka la 31 Mei 2022.

Legatong la Bolaodiphethiši le setšhaba ka moka sa yunibesithi, ke romela ditebogo go tšwa dipelong tša rena ka moka go badiramongo, bao ba tšwelago pele ka go emela leina la yunibesithi ka boikgafo le mafolofolo, le ka gare ga maemo a a go ba le ditlhohlo.

Ditebogo tša go tšwa dipelong tša rena gape di ya go badiramongo ka mafelong a mangwe a go fapana bao ba tšwelago pele go dira mošomo wa bona, le ge e le gore ke ka fase ga maemo a boima.

Re go netefatšaga gore re ikemišeditše go tšwela pele ka ditherišano tša semmušo le tša semolao le bašomi bao ba lego seteraekeng go tšwetšapele lenaneo la thuto, maitshwaro a *Botho*, tekatekano le toka setšhabeng. Le ge go le bjalo, rena bjalo ka Boetapele bja yunibesithi, re rata go bolela gore Diyunibesithi ke di institšhušene tša setšhaba tše morero wa tšona e lego go fetola baithuti go ba dira ditsebi tše di šomelago setšhaba ebile di le bohlokwa diphetogong tša maemo a ekonomi le a dipolotiki setšhabeng ka kago ya tsebo le phatlalatšo. Ye ke pitšo le morero woo Unisa e ka se go tlogelego. Re dira boipiletšo go badiramongo bao ba seteraekago, go latela melao ya yunibesithi le melao ya naga, yeo magareng a tše dingwe, e lego kgahlanong le dikgaruru, matšhošetši go baithuti le badiramongo, le maitshwaro a bosenyi ka kakaretšo. Re ikgafela go dipoledišano tše di tšwelago pele ka maikemišetšo a go hwetša tharollo ya seteraeke se se diragalago.

Go lena ka moka bao le tšwelago pele go thekga lenaneo la thuto, re rata go leboga le go tumiša mošomo wa lena wo mobotse. Re bona maitapišo a lena. Re le leboga go menagane ka go fofišetša folaga ya Unisa godimo mo gare ga maemong a a boima.

A re šomeng!

Ke a leboga

***Profesa Puleng LenkaBula***

***Hlogo le Motlatšamokhanseliri***